

**Yang Berhormat Pehin Orang Kaya Seri Kerna Dato Seri
Setia (Dr) Haji Awang Abu Bakar bin Haji Apong
Menteri Hal Ehwal Dalam Negeri**

**Sesi Muzakarah bersama Ahli-Ahli Yang Berhormat Majlis
Mesyuarat Negara 2020**

**Hari Sabtu, 22 Jamadilawal 1441H bersamaan 18 Januari 2020 M
Bilik Mesyuarat Aras 4, Jabatan Daerah Brunei dan Muara**

*A*ssalamualaikum Warahmatullahi Wabarakatuh dan Salam
Sejahtera

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ ، وَالصَّلَاةُ وَالسَّلَامُ عَلَى أَشْرَفِ
الْمُرْسَلِينَ ،
وَعَلَى آلِهِ وَصَحْبِهِ أَجْمَعِينَ ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ

Ahli – Ahli Yang Berhormat Majlis Mesyuarat Negara

Yang Mulia Setiausaha Tetap – Pemangku Setiausaha Tetap;

dan Timbalan Setiausaha Tetap Kementerian Hal Ehwal Dalam Negeri

Yang Mulia Ketua – Ketua Jabatan dan Pegawai – Pegawai Kanan
Kementerian Hal Ehwal Dalam Negeri yang dihormati sekalian

1. Kita bersyukur ke hadrat Allah Subhanahu Wata'ala dengan izinNya jua, kita dapat sama-sama hadir di sesi muzakarah bersama Yang Berhormat Ahli-Ahli Majlis Mesyuarat Negara pada petang ini. Peramba/ Kaola / Saya mewakili Setiausaha-Setiausaha Tetap, Timbalan-Timbalan Setiausaha Tetap, Ketua-Ketua Jabatan dan seluruh warga Kementerian Hal Ehwal Dalam Negeri sukacita mengalu-alukan kehadiran Ahli-Ahli Yang Berhormat ke majlis ini.

2. Setelah mendapatk *insights* terhadap struktur organisasi dan peranan serta tugas Kementerian Hal Ehwal Dalam Negeri dan Jabatan-jabatan di dalamnya, berikutan dari lawatan Ahli-Ahli Yang Berhormat ke Jabatan Penjara Maraburong pada hari yang lepas dan menyaksikan booth pameran yang disediakan di Hari Terbuka Kementerian Hal Ehwal Dalam Negeri pagi tadi, kita berharap sesi muzakarah kali ini dapat pula kita jadikan sebagai wadah untuk bertukar-tukar fikiran, mengongsikan pandangan yang membina, menerima cadangan dan juga mendengar isu-isu semasa yang akan dapat menyumbang kepada merapatkan lagi jurang dalam perkhidmatan dan dasar Kementerian ini ke arah meningkatkan mutu perkhidmatan dan peningkatan kesejahteraan orang awam dan merealisasikan matlamat Wawasan Brunei 2035.

Ahli-Ahli Yang Berhormat,

3. Kementerian Hal Ehwal Dalam Negeri telah pun menyusun beberapa inisiatif dan rancangan bagi mendokong hasrat Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam memajukan disamping kekal memelihara kesejahteraan dan keamanan Negara Brunei Darussalam. Ianya juga selaras dengan rancangan strategi Kementerian ini bagi membantu mengukuhkan keselamatan, kesejahteraan, memangkin sosio ekonomi dan meningkatkan perpaduan masyarakat.

4. Sehubungan itu, di era yang serba digital dan dimana dunia sedang memasuki *Fourth Industrial Revolution*, Kementerian ini terus berusaha memudahcara proses pengurusan dengan menambah beberapa perkhidmatan di atas talian. Inisiatif-inisiatif ini juga dapat mengukuhkan keselamatan dan kesejahteraan rakyat. Antaranya ialah pembayaran perkhidmatan menggunakan kad debit / kredit di Jabatan Imigresen dan Pendaftaran Kebangsaan (JIPK) bagi meningkatkan kualiti kerja dan memberi kemudahan orang ramai untuk membuat urusan di Jabatan tersebut.

5. Jabatan Imigresen dan Pendaftaran Kebangsaan dan Jabatan Buruh juga sedang giat melaksanakan satu (1) sistem dengan dokongan pihak Pusat Kebangsaan E-Kerajaan (EGNC) yang mana diharap akan dapat meningkatkan tahap perkhidmatan kepada orang ramai dalam berbagai perkhidmatan seperti pendaftaran Kad Pengenalan, Pasport, pendaftaran kelahiran, kematian dan penggunaan biometrik di pos-pos kawalan. Sistem ini juga akan memberi kaedah pembaharuan di dalam proses dan kebenaran mengeluarkan Visa dan pas Kerja serta perkara-perkara yang berkaitan dengan warganegara asing yang bekerja di Negara Brunei Darussalam dengan lebih efisien dan teratur. Antara impak utama adalah memberikan peluang untuk orang ramai menghadapkan berbagai permohonan secara online dan mengurangkan tempoh proses pemberian kelulusan. Salah satu (01) lagi faedah penting yang akan diperolehi dengan sistem ini ialah mengukuhkan lagi aspek sekuriti di pos-pos kawalan di

negara ini dengan penggunaan biometrik. InshaAllah sistem ini dijangka akan mula digunakan pada bulan Julai tahun ini.

6. Kita juga di dalam proses melaksanakan sistem e-voting. Sistem aplikasi ini nanti akan dapat digunakan untuk mengundi calon-calon Penghulu Mukim dan Ketua Kampong disamping kaedah pengundian melalui tablet pengundian yang telah sedia ada. InshaAllah ianya akan dapat membantu mempercepatkan proses-proses pengisian jawatan Penghulu Mukim dan Ketua Kampong dengan memanfaatkan kaedah sistem teknologi moden secara kos efektif.
7. Alhamdulillah, dalam ekonomi dunia yang belum pulih, iklim perniagaan yang berubah dan juga citarasa pengguna yang berubah, Kementerian ini, telah melancarkan *website* Satu Kampong Satu Produk (1K1P). Dengan adanya platform berkenaan, ianya akan dapat membantu pengusaha-pengusaha 1K1P memperkenalkan produk mereka kepada orang ramai dan seterusnya membantu meningkatkan pemasaran produk-produk mereka.
8. Seterusnya, dibawah usaha Satu Kampong Satu Produk (1K1P), Alhamdulillah, kita juga telah pun menjalin kerjasama dengan Syarikat Ganim bagi mempromosikan lima (5) produk untuk di angkat bagi menembusi pasaran luar negara. Lima produk tersebut adalah kerepek pisang madu, kuih tart nenas, kerepek ubi, kuih jala dan teh herba. Kementerian ini melalui Institusi

Mukim dan Kampong akan sentiasa meneliti semula, menyelaraskan dan menyesuaikan dengan perubahan-perubahan masa ini samaada dari segi produk, operasi dan sebagainya.

Ahli-Ahli Yang Berhormat,

9. Didalam mendokong kewujudan masyarakat yang hidup harmoni dan sejahtera dan selaras dengan titah Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam sempena menyambut tahun baru 2020, bahawa "Keamanan dan kesejahteraan sangat penting untuk pembangunan. Tanpa keamanan dan kesejahteraan, pembangunan pasti tergendala. Bahkan rancangan-rancangan atau usaha-usaha merealisasikan matlamat-matlamat Wawasan juga akan terjejas. Di sinilah harga keamanan itu". Demikian titah Baginda. Dari itu, beberapa inisiatif tambahan akan dilaksanakan ke arah menukar sikap masyarakat umumnya menjadi rakyat yang patuh kepada undang-undang (*law abiding citizens*), dan dalam masa yang sama menyumbang kepada peningkatan hasil Kerajaan dengan mengenakan kaedah kompaun sebagai *deterrent* kepada potensi pesalahlaku atau *potential offenders*. Kita sedang didalam proses membuat pindaan kepada beberapa akta seperti; Akta Kesalahan Kecil Penggal 30 dalam menangani isu pembuangan sampah dengan mengenakan denda yang lebih berat dan juga *Fire Safety Order 2016* (mengawal keselamatan kebakaran ke atas premis-premis perniagaan) dimana kita berharap dengan adanya perubahan-perubahan tersebut, ianya akan mengenakan

kompaun ke atas premis-permis perniagaan yang tidak mengikut peraturan yang telah ditetapkan. Menurut statistik Jabatan Bomba dan Penyelamat bagi bulan Januari sehingga November 2019, daripada 966 pemeriksaan ke atas premis bangunan, sebanyak 683 kesalahan yang boleh dikompaun. Walau bagaimanapun, tujuan ianya akan diperkenalkan ialah sebagai *deterrent* kepada berlakunya ketidakpatuhan (non-compliant) kepada keselamatan kebakaran (fire safety), dan yang paling penting adalah untuk memastikan setiap individu yang berkunjung ke premis-premis bangunan di negara ini khasnya premis-premis swasta akan sentiasa terpelihara dari aspek keselamatan kebakaran (fire safety).

Ahli-Ahli Yang Berhormat,

10. Mengambil kira pentingnya Penghulu dan Ketua Kampong sebagai pemimpin akar umbi yang bertanggung jawab bagi membantu memastikan rakyat dan penduduk Negara ini hidup dalam aman dan sejahtera, Kementerian ini telah membuat beberapa inisiatif bagi memperkesakan lagi tahap pemedulian rakyat dan penduduk di Negara ini melalui Institusi Penghulu Mukim dan Ketua Kampong.

11. Alhamdulillah, Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam telah pun memperkenankan bagi pelaksanaan rancangan rezoning bagi kawasan Kampong Ayer dan kawasan darat. Dengan

adanya projek re-zoning di Kampong Ayer dan juga darat, ianya akan meningkatkan keberkesanan pengurusan dan pentadbiran mukim-mukim dan kampong-kampong dengan mengambilkira akan keperluan dan perkembangan semasa. Ianya juga mengseimbangkan tugas dan tanggungjawab Penghulu Mukim dan Ketua Kampong dalam mengurustadbir mukim dan kampong dalam jumlah keramaian penduduk yang bersesuaian dan *manageable*.

12. Untuk makluman Yang Berhormat Projek re-zoning ini melibatkan pengurangan jawatan Penghulu Mukim dari 39 jawatan ke 31 jawatan (pengurangan 8 jawatan) dan penambahan jumlah Ketua Kampong dari 185 jawatan ke 191 jawatan.

13. Selaras dengan usaha tersebut juga, Kementerian ini dari masa ke semasa telah dan akan sentiasa bekerjasama dengan Agensi yang berkepentingan bagi meningkatkan Kapasiti Penghulu Mukim dan Ketua Kampong yang akan mejawat jawatan tersebut dengan memberikan kursus yang akan membantu mereka memimpin masyarakat diperingkat kampong, mukim dan daerah.

14. Dalam hal kesejahteraan jua, kita jua ingin menyentuh mengenai dengan program Rakan Seliaan yang dikendalikan oleh pihak Jabatan Penjara yang bertujuan bagi membantu bekas-bekas pesalah kepada pengintegrasian ke dalam masyarakat. Untuk itu Kementerian ini melalui Jabatan Penjara telah dan akan terus bekerjasama dengan Agensi-Agensi Kerajaan dan khasnya Bukan

Kerajaan seperti NGOs dan pihak swasta bagi sama-sama mendokong program-program rehabilitasi yang diaturkan oleh Jabatan Penjara seperti penyediaan pekerjaan dan dorongan untuk mereka bergiat di dalam aktiviti perusahaan mikro dan kecil-kecilan melalui penglibatan ekspo dan seumpamanya. Bermula Januari 2019 sehingga Disember 2019, seramai 108 orang telah menyertai program Rakan Seliaan berbanding sasaran 100 orang bagi tahun berkenaan, yang mana 35 orang daripadanya mempunyai pekerjaan samaada dengan sektor swasta atau pun berniaga sendiri. Pada bulan Oktober 2019, Projek Jahitan dan Showroom Jualan Produk Rakan Seliaan telah mula beroperasi di Perindustrian Ringan Beribi Gadong yang mempamerkan produk-produk Jabatan Penjara. Ianya diharap menjadi salah satu saluran bagi memasarkan produk Jabatan berkenaan. Perlu ditekankan bahawa pencapaian ini adalah hasil sokongan penuh daripada pelbagai pihak terutama sekali daripada pihak NGOs dan swasta. Pada tahun 2019 sebanyak 28 organisasi (8 persatuan dan 20 syarikat swasta) telah menjadi rakan strategik Jabatan Penjara berbanding 10 pada tahun sebelumnya. Untuk itu saya mengambil kesempatan ini mengucapkan setinggi-tinggi penghargaan dan berbanyak terima kasih kepada pihak-pihak yang terlibat dan berharap lebih banyak lagi pihak yang berkepentingan akan tampil menjadi rakan strategik Jabatan Penjara.

15. Pendekatan (approach) ke arah meningkatkan keselamatan dan kesejahteraan rakyat dan penduduk di negara ini juga dilaksanakan melalui program-program yang menghasilkan

masyarakat yang sentiasa siap siaga atau *emergency* dan *disaster ready*. Kita mengambil maklum bahawa masyarakat sekeliling memainkan peranan penting dalam turut sama menjaga kesejahteraan penduduk di kampong dan mukim masing-masing. Untuk itu, NDMC dan Jabatan Bomba dan Penyelamat dan akan terus melibatkan masyarakat melalui *community outreach program* masing-masing. Alhamdulillah, melalui pendekatan ini sebanyak 59 kes kejadian kebakaran pada tahun 2019 telah ditangani oleh orang awam sebelum kehadiran pihak bomba dan penyelamat ke tempat kejadian.

Ahli-Ahli Yang Berhormat,

16. Kementerian ini juga turut menyumbang kepada meningkatkan aktiviti perekonomian dan seterusnya mempunyai matlamat untuk merevitalisasi kawasan Pusat Perniagaan (Central Business District) di Bandar Seri Begawan. Dalam usaha untuk memanfaatkan aset-aset yang ada dan meningkatkan lagi kualiti aset berkenaan, Alhamdulillah, Kementerian ini telah menerima kerjasama dan komitmen daripada Syarikat P Cube Sdn Bhd untuk melaksanakan inisiatif *Public Private Partnership* (PPP) iaitu; Request for Proposal to Invest, Build and Operate The Integrated Development of Multi Storey Car Park Building dan Bumiputera Commercial Trade Centre, Request for *Proposal To Invest, Build and Operate The Development of* Agensi Pekerjaan Tempatan dan Pembangunan Tenaga Kerja (APTK) *Building* dan juga *Expression of Interest to Finance, Develop, Operate and Maintain Pasar*

Gadong dan Tamu Selera. Diharap dengan adanya kerjasama ini, kita akan dapat menarik pelabur-pelabur dalam dan luar Negeri untuk memperkembang majukan asset-asset Kerajaan yang boleh mengembang dan memajukan perusahaan Mikro, Kecil dan Sederhana.

17. Berdasarkan dengan inisiatif-inisiatif yang telah dibentangkan, Kementerian Hal Ehwal Dalam Negeri akan terus berusaha dalam memberikan perkhidmatan yang lebih baik dan dalam pada masa yang sama mencapai objektif Negara iaitu Wawasan 2035. Sekali lagi saya mengucapkan ribuan terima kasih kepada Ahli-Ahli Yang Berhormat di atas kesudian menghadiri muzakarah pada petang ini. Saya berharap kita akan dapat sama-sama menjalankan peranan, tugas dan tanggungjawab yang diamanahkan dengan effisen dan berkesan.

Sekian,

Wabilahit Taufik Walhidayah Wassalamualaikum Warahmatullahi Wabarakatuh.